

5238.38/2457

v. 10

• TC4041(10)

誄

行狀

策文

元后誄

新室文母太后崩天下哀痛號哭涕泗思慕功德咸上詞誄之銘

楊侍郎

曰

惟我有新室文母聖明皇太后姓出黃帝西陵昌意實生高陽純

德虞帝孝聞四方登陟帝位禪受伊唐爰初祚土陳田至王營相

厥宇渡河濟旁沙麓之靈太陰之精天生聖姿豫有禪禎作合于

漢配元生成孝順皇姑承家尚莊內則純被後烈丕光肇初配元

天命是將兆徵顯見新都黃龍漢成既終胤嗣匪生哀帝承祚惟

離典經尚是言異大命俄顛厥年天隕大終不盈文母覽之千載



CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY  
JUN 15 1945

不傾博選大智新都宰衡明聖作佐與圖國艱以度厄運微立中  
山庶其可濟博采淑女備其姪娣覲禮高禱祈廟嗣繼靡格匪天  
靡勳匪地穆穆明明昭事上帝弘漢祖考夙夜匪懈興滅繼絕博  
立侯王親睦庶族昭穆序明帝致友屬靡有遺荒咸被祚慶冀以  
金火赤仍有央勉進大聖上下兼該群祥衆瑞正我黃來火德將  
滅惟后于斯天之所壞人不敢支哀平夭折百姓分離祖宗之德  
終其不全天命有託謫在于前屬遭不造榮極而遷皇天眷命黃  
虞之孫歷世運移屬生聖新代于漢劉受祚于天漢祖承命赤傳  
于黃攝帝受禪立為真皇久受厥中以安黎衆漢廟黜廢移定安

公皇皇聖祖惟若孔臧降茲珪璧命服有常為新帝母鴻德不忘  
欽德伊何奉命是行菲薄服食神祇是崇尊不虛統惟祇惟庸隆  
循人敬先民是從承天祇家允恭虔恪豐阜庶卉旅力不射恤民  
子留不皇說作別計十邑國之是度還奉于此以處貧薄罷旄置  
縣築里作皂以處貧窮哀此嫠獨起常盈倉五十萬斛為諸生儲  
以勤好學志在黎元是勞是勤春巡灞漘秋臻黃山夏撫鄆杜冬  
郵涇樊大射饗飲飛羽之門綏宥耆幼不拘婦人刑女歸家以育  
貞信玄冥季冬搜狩上蘭寅賓出日東秩賜谷鳴鳩排羽戴勝降  
桑蠶于繭館躬隄執曲帥導群妾咸循蠶簇分繭理綵女工是勅

遐邇蒙祉中外禔福自京建海靡不仰德成類存生秉天地經無  
物不理無人不寧尊號文母與新有成世奉長壽靡墮有傾著德  
太常注諸旒旌嗚呼哀哉萬方不勝德被海表彌沅魂精去此昭  
昭就彼冥冥忽兮不見超兮西征即作下宮不復故庭爰緘伊銘  
嗚呼哀哉

王仲宣誄

陳思王

建安二十二年正月二十四日戊申魏故侍中關內侯王君卒嗚  
呼哀哉皇穹神察詰人是恃如何靈祇殲是吉士誰謂不痛早世  
卽冥誰謂不傷華繁中零存亡分沓天遂同期朝聞夕沒先民取

思何用誄德表之素旗何以贈終哀以送之遂作誄曰  
猗歎侍中遠祖彌芳公高建業佐武伐高爵同齊魯邦嗣絕亡流  
裔畢萬勳績惟光晉獻賜封於魏之疆天開之祚末胄稱王厥性  
斯氏條分葉散世溢芳烈揚聲秦漢會遭陽九炎光中燿世祖撥  
亂爰建時雍三台樹位履道是鍾寵爵之加匪蕙惟恭自君二祖  
為光為龍僉曰休哉宜翼漢邦或統太尉或掌司空百揆惟叙五  
典克從天靜人和皇教遐通伊君顯考奕葉佐時入管機密朝政  
以治出臨朔岱庶績咸熙君以淑懿繼此洪基既有令德材枝廣  
宜強記洽聞幽讚微言文若春華思若涌泉發言可詠下筆成篇

何道不洽何藝不閑綦局逞巧博奕惟賢皇家不造京室隕顛宰  
臣專制帝用西遷君乃羈旅離此阻艱翕然鳳舉遠窺荆蠻身窮  
志達君鄙行鮮振冠南嶽濯纓清川潛處蓬室不干勢權我公奮  
鉞耀威南楚荆人或違陳戎講武君乃義發美我師旅高尚伯  
功投身帝宇斯言既發謀夫是與是與伊何響我明德投戈編郤  
稽顙漢北我公寔嘉表揚京國金龜紫綬以彰勲則勲則伊何勞  
謙靡已憂世忘家殊畧卓峙乃署祭酒與君行止笑無遺策畫無  
失理我王建國百司俊乂君以顯舉秉機省闈戴蟬珥貂朱衣皓  
帶入侍帷幄出擁華蓋榮耀當世芳風賡藹嗟彼東夷憑江阻湖

騷擾邊境勞我師徒光允戎輅霆駭風徂君侍革輶輝耀王塗思  
榮懷附望彼來威如何不濟運極命衰寢疾彌留吉往凶歸嗚呼  
哀哉翩翩孤嗣號慟崩摧發軔北魏遠迄南淮經歷山河泣涕如  
頽哀風興感行雲徘徊游魚失浪歸鳥忘棲嗚呼哀哉吾與夫子  
義貫丹青好和琴瑟分過友生庶幾遐年攜手同征如何奄忽棄  
我夙零感昔宴會志各高厲予戲夫子金石雖契人命靡常吉凶  
異制此歆之人孰先隕越何寤夫子果乃先逝又論死生存止數  
度子猶懷疑求之明據倘獨有靈游魂泰素我將假翼飄颻高舉  
超登景雲要子天路喪柩既臻將及魏京靈輶迴執白驢悲鳴虛

廓無見藏影蔽形孰云仲宣不聞其聲延首歎息兩泣交頰嗟乎  
夫子永安幽冥人誰不沒達士徇名生榮死哀亦孔之榮嗚呼哀  
哉

楊荊州誄

潘黃門

維咸寧元年夏四月乙丑晉故折衝將軍荊州刺史東武戴侯榮  
陽楊使君薨嗚呼哀哉夫天子建國諸侯立家選賢與能政是以  
和周賴尚文殷憑太阿矯矯楊侯晉之爪牙忠節克明茂績維嘉  
將宏王畧肅清荒遐降年不永玄首未華銜沒世命也奈何嗚呼  
哀哉自古在昔有生必死身沒名垂先哲所歸行以號彰德以述

美敢託旒旗爰作斯誄其辭曰  
邈矣遠祖系自有周昭穆繁昌枝庶分流族始伯喬氏出楊侯奕  
世不顯允迪大猷天厭漢德龍戰未分伊君祖考方事之殷鳥則  
擇木臣亦簡君投心外朝策名委身奮躍淵塗騁騰風雲或稅驍  
騎或據領軍篤生戴侯茂德繼期纂戎洪緒克構堂基弱冠味道  
無競惟時孝實蒸蒸友亦怡怡多才豐蕪疆記洽聞目睇毫末心  
算無垠草隸兼善尺牘必珍足不輟行手不釋文翰動若飛紙落  
如雲學優則仕乃從王政敬璞發輝臨軹作令化行邑里惠洽百  
姓越登司官肅我朝命惟此大理國之憲章君蒞其任視民如傷

廣獄明慎刑辟端詳聽參臯呂稱伴于張改授農政于彼野王倉  
盈庾億國富兵強煌煌文后鴻漸晉室君以兼資參戎作弼用錫  
土宇膺茲顯秩青社白茅赤朱其敝魏氏順天聖皇受終烈烈楊  
侯實統禁戎司管閭闔清我帝宮苛慝不作穰如和風謂督勲勞  
班命彌崇茫茫海岱玄化未周滔滔江漢疆場分流秉文兼武時  
惟楊侯既守東莞乃收荆州折衝萬里對揚王休聞善若驚疾惡  
如讐示威示德以伐以柔吳夷凶侈偽師畏逼將乘讐讐席卷南  
極繼寨糧盡神謀不惑君子之過引曲推直如彼日月有時則食  
負執其咎功讓其力亦既旋旆為法受黜退守丘陸杜門不出游

日典墳縱心儒術祈祈縉紳升堂入室靡事不咨無疑不質位貶  
道行身窮志逸非慮非圖乃寢乃疾昊天不弔景命其卒嗚呼哀  
哉子囊佐楚遺言城郢史魚諫衛以尸顛政伊君臨終不忘忠敬  
寢伏床蓐念在朝廷朝達其辭夕隕其命聖王嗟悼寵贈衾襚誄  
德策勲考終定謚群辟動懷邦族揮淚孤嗣在疚寮屬含悴赴者  
同哀路人增歎嗚呼哀哉余以頑蔽覆露重陰仰追先考執友之  
心俯感知已識達之深承諱忉怛涕淚霑襟豈忘載奔憂病是沈  
在疾不省於亡不臨舉斂增慟哀有餘音嗚呼哀哉

夏侯常侍誄

潘黃門

夏侯湛字孝若譙國譙人也少知名弱冠辟太尉府掾賢良方正  
徵為太子舍人尚書郎野王令中書郎南陽相家艱乞還頃之選  
為太子僕未就命而世祖崩天子以為散騎常侍從班列也春秋  
四十有九元康元年夏五月壬辰寢疾卒於延熹里第嗚呼哀哉  
乃作誄曰  
禹錫玄珪賈曰文命克明克聖光啟夏政其在于漢邁勲惟嬰思  
弘儒業小大獲名顯祖曜德收克及荆艾守淮岱治亦有聲英英  
夫子灼灼其雋遠辯擗藻華繁玉振如彼隨和發彩沉潤如彼錦  
績列素點緇人見其表莫測其裏徒謂吾生文勝則史心照神交

唯我與子且歷少長建觀終始子之承親孝齊閔參子之友悌和  
如琴瑟事君直道與朋信心雖實唱高猶賞爾音弱冠屬翼羽儀  
初升公弓既招皇輿乃徵內贊兩宮外宰黎蒸忠節允著清風載  
興汝彼樂都寵子惟王設官建輔妙簡良印用取喉舌相爾南陽  
惠訓不倦視人如傷乃眷北顧辭祿延熹余亦偃息無事明時疇  
昔之游二紀于茲班白携手何歎如之居吾語汝衆實勝寡人惡  
偶異俗疵文雅執戟疲楊長沙投賈無謂爾高恥居物下子乃洗  
然變色易容慨然歎曰道固不同為在由己匪我求蒙誰毀誰譽  
何去何從莫涅匪緇莫磨匪磷子獨正色居屈志申雖不爾以猶



致其身獻替盡規媚茲一人讒言忠謀世祖是嘉將僕儲皇奉饗  
承華先朝末命聖烈顯加入侍帝闈出光厥家我聞積善神降之  
吉宜享遐紀長保天秩如何斯人而有斯疾曾未知命中年隕卒  
嗚呼哀哉惟爾之存匪爵而貴甘食美服重珍兼味臨終遺誓永  
錫爾類歛以時襲殯不簡器誰能拔倍生盡其養孰是養生而  
薄其葬洲哉若人縱心條暢保操明達因而彌亮柩輅既祖容体  
長歸存亡未訣逝者不追望子舊車覽爾遺衣幅抑失聲逆涕交  
揮非子為慟吾慟為誰嗚呼哀哉日往月來暑退寒襲零露霏凝  
勁風淒急慘爾其傷念我良執適子素館撫孤相泣前思未弭後

感仍集積悲滿懷逝矣安及嗚呼哀哉

馬汧督誄

潘黃門

惟元康七年秋九月十五日晉故督守關中侯扶風馬君卒嗚呼  
哀哉初雍部之內屬羌反未弭而編戶之氏又肆逆焉雖王旅  
致討終於殄滅而蜂蠆有毒驟失小利俾百姓流亡頻以塗炭建  
威喪元於好時州伯宵遯乎大谿若夫偏師裨將之隕首覆車者  
益以十數剖符專城紆青拖墨之司奔走失其守者相望於境秦  
隴之僭鞏更為魁既已襲汧而館其縣子以恥爾之身介乎重關  
之稟率寡弱之衆據十雉之城羣民如蝟毛而起四面雨射城中

城中鑿穴而處負戶而汲木石將盡樵蕪乏竭芻蕘罄絕于是子  
發梁棘而用之弓以鐵鑠機關既縱礮而又升烏爨陳焦之麥柿  
栲楠之松用能薪芻不置人畜取給青煙傍起樵馬長鳴凶醜  
駭而疑懼乃闕地而攻子命穴浚塹寘虛鑪瓶甌以傾之將穿城  
響作因焚穰火薰之潛氏殲焉久之安西之救至竟免虎口之厄  
全數百萬石之積文契書於幕府聖朝疇咨進以顯秩殊以幢蓋  
之制而州之有司乃以私隸數口穀數十斛考訊吏兵以槓楚之  
絳連之大將軍屢抗其疏曰敦固守孤城獨當羣寇以少禦衆載  
離寒暑臨危奮節保穀全城而雍州從事忌敦勲效極推小疵非

所以褒獎元功宜解敦禁劾假授詔書遽許而子固以下獄發憤  
而卒也朝廷聞而傷之策書曰皇帝咨故督守關中侯馬敦忠勇  
果毅率屬有方固守孤城危逼獲濟寵秩未加不幸喪亡朕用悼  
焉今追贈牙門將軍印綬祠以少牢魂而有靈嘉茲麗榮然潔士  
之聞穢其庸致思乎若乃下吏之肆其喋害則皆妬之徒也嗟乎  
妬之欺善抑亦習首之讐也語曰或戒其子慎無為善言固可以  
若是悲夫昔乘丘之戰驟賁父御魯莊公馬驚敗績賁父曰他日  
未嘗敗績而今敗績是無勇也遂死之圍人浴馬有流矢在白肉  
公曰非其罪也乃誅之漢明帝時有司馬叔持者白日於都市手

叙艾暨視死如歸亦命史臣班固為之誄然則忠孝義烈之流慷慨非命而死者綴辭之士未之或遺也天子既已策而贈之微臣託手舊史之末敢闕其文哉乃作誄曰

知人未易人未易知嗟茲馬生位末名卑西戎猾夏乃奮其奇保此汧城救我邊危彼邊奚危城小粟富子以眇身而裁其守兵無加衛墉不增寨窳窳群狄豺虎競逐鞏更恣睢潛時官寺脅萬虓闕震驚台司聲勢沸騰種落燭熾旌旗電舒戈矛林植彤珠星沉飛兵雨集惴惴士女號天以泣爨麥而炊負戶以汲累卵之危倒懸之急馬生爰發在險彌亮精貫白日猛烈秋霜稜威可屬懦

夫克壯聖恩撫循寒士挾纊蠢蠢犬羊阻衆陵寡潛隧密攻九地之下惓惓窮城氣若無假昔命懸天今也惟馬惟此馬生才博智瞻偵以瓶壺剗以長壑殫未見鋒火以起燭薰尸滿窟括穴以歛木石墮竭蕞稈空虛矧然馬生傲若有餘弓梁為礮栢松為箭守不乏械樞有鳴駒哀哀建威身伏斧質悠悠烈將覆車喪器戎釋我徒顯誅我帥以生易死疇克不二聖朝西顧關右震惶分我汧庾化為寇糧實賴夫子思謇彌長咸使有勇致命知方我雖末學聞之前典十世宥能表墓旌善思八愛樹甘棠勿剪矧乃君子功深疑淺兩造未具儲隸蓋鮮孰是勲榮而不獲免猾哉部司其心

反側斲善害能醜正惡直收人逶迤自公退食聞穢鷹揚曾不  
戢翼忘爾大勞猜爾小利苟莫開懷于何不至慨慨馬生碌碌高  
致發憤固圉沒而猶眠嗚呼哀哉安平出奇破齊克完張孟運籌  
危趙獲安汧人賴子猶彼談卓如何吝嫉搗之筆端傾倉可賞矧  
云私粟狄隸可頒况曰家僕剔子雙龜貫以三水功存汧城身死  
汧獄凡爾同圍心焉摧剝扶老携幼街號巷哭嗚呼哀哉明明天  
子旌以殊恩光光寵贈乃牙其門司勳班爵亦兆後昆死而有  
靈庶慰冤魂嗚呼哀哉

楊仲武誄

潘黃門

楊經字仲武滎陽宛陵人也中領軍肅侯之曾孫荊州刺史戴侯  
之孫東武康侯之子也八歲喪父其母鄭氏光祿勳密陵成侯之  
元女操行甚高恤養幼孤以保又夫家而免諸艱難戴侯康侯多  
所論著又善草隸之藝子以幼年之秀固能綜覽義旨而執式模  
範矣雖舅氏隆盛而孤貧守約心安陋巷體服菲薄余甚奇之若  
乃清才雋茂盛德日新吾見其進未見其已也既藉三葉世親之  
恩而子之姑予之伉儷焉往歲卒於德宮里喪服周次綢繆累  
月苟人必有心此亦款誠之至也不幸短命春秋二十九元康九  
年夏五月己亥卒嗚呼哀哉乃作誄曰

伊子之先奕葉熙隆惟祖惟曾載揚休風顯考康侯無祿早終名  
雖光勲業未融吾子誕茂淑姿克岐克嶷知章知微鈎深探  
賸味道研幾匪直也人邦家之輝子之邁閔曾未齒鬢如彼危根  
當此衝飈德之休明靡幽不喬弱冠流芳雋聲清劭爾舅惟榮爾  
宗惟瘁幼秉殊操遠豐安置撫錄先訓俾無隕墜舊文新執罔不  
必肄潘楊之榜有自來矣矧乃今日慎終如始爾戚尔休如實在  
已視予猶父不得猶子敬亦既薦愛亦既深雖殊其年實同厥心  
日昃景西望子朝陰如何短折皆世湮沈嗚呼哀哉寢疾彌留守  
茲孝友臨命忘身頌戀慈母哀哀慈母痛心疾首嗷嗷同生悽悽

諸舅春蘭擢莖方茂其華荆寶挺璞將剖於和含芳委耀毀璧摧  
柯嗚呼仲武痛哉奈何德宮之親同次外寢惟我與爾對筵接枕  
自時迄今曾未盈稔姑姪繼隕何痛斯甚嗚呼哀哉披帙散書屢  
覩遺文有造有寫或草或真執玩周復想見其人紙勞于手涕霑  
于巾龜筮既襲埏隨既開痛矣楊子與世長乖朝濟洛川夕次山  
隈歸鳥頡頏行雲徘徊臨穴永訣撫櫬盡哀遺形莫紹增慟余懷  
魂兮往矣梁木實摧嗚呼哀哉

吳故丞相陸公誄

陸清河

惟赤烏八年二月粵乙卯吳故使持節郢州牧左都護丞相江陵

郡侯陸公鼂嗚呼哀哉皇朝迭紹成命昊天聖王作矣世有哲臣  
觀監在兵乃降斯神思皇我后應運對揚穎秀若華景逸扶桑龍  
輝紫極鳳鳴玉堂舉旗清阻奮鉞夷荒悠結沉維峻極公綱將撫  
遠績括地九圍皇淳奕泰昊昊疾威生民如何哲人具頽登靈在  
天遺音播徽敢揚元勳表之素旂乃作誄曰  
濬哲我祖時文峻德玄粹納真清休載式本承慶輝駿惠罔極申  
錫多祐本支千億芳條達蔭靈根茂植根條伊何苗黃裔舜長發  
有祥貽我祚晉神明之緒寶蕃瑰雋和音嗣世不替碩彥明鑒在  
下降命上玄我公初載天嘏之純重光納照旋璣授銓印儀喬嶽

俯濯洪川清輝秀穎雲翹映晨肇彼岐嶷允迪天真先心則智率  
意斯仁秉彛清昧體靈協神神休載鑠九德兼和挹暉茂朴豐淳  
鎮華景峻凌高玄源湧波造辰竦隆彌海廓遐光備既淳逸軌爰  
超閔綱苞荒景靈渥耀山林嶽秀天光乃照窮化機神探蹟衆妙  
駭塵氛埃澄響清肖岷淵博量騰峻峻邵振綱宇表登軌絕陷厥  
初藏器棲蟠海嶽披藻崑崙濯秀暘谷沉輝熙茂清塵熠鏗含章  
在淵發揮龍躍時伏陽九承乾之衰有皇于井玉軒徘徊爰茲赫  
奕需期雲飛天步皇輿載見太微華堂誕基委蛇自階禹輝既濟  
嘉命乃集和美未旣宰物下邑康年屢登惠風時協在斯無頌于

教斯輯金虎觀精戎車孔肆神器播越天人釋位有命在茲帝思  
元帥委弁總干振翼虎噬威靈既授六軍有序乃誓我衆乃整我  
旅神干山立雄旗電舉懸旌汜陽即戎江潁我后日敬上帝臨予  
靖端夙夜匪寧匪處經始綿綿滂沱惟海乃幹中軍入作內輔公  
侯陟降在帝左右閔羽治天作靈西土帝曰將軍整爾熊虎赫赫  
明明皇輿出祖龍舟照淵旛旌映野鋪敦江濱仍執醜虜荆南既  
集方嶮未夷天子命我撫之西重公侯戾止威神緝熙虔劉作虐  
思輯子來妖於北靡舉爾雄旗殲彼羣蠻祁祁遺黎柔遠能和薄  
言綏之方隅肅清烈文雋武舍爵明堂冊勳天府天子曰咨我圖

乃功錫爾青玉建侯于東開國名墟光宅海邦分圭作寶軒輅以庸  
既受帝祐公用加大駟鉞孔阜元戎杳藹淑旂飛藻綏章承蓋  
振我輝靈四方于邁劉王負檢寇戎西隣公侯赫怒干戈啟陳金  
鉞鏡日雲旗絳天凌岡襄嶽沉維括淵元王隕難鯨鯢墜鱗戎漢  
時殪方域清塵曹休東踰我疆斯越帝簡厥佐將命其傑乃俾我  
公啟行警伐江漢之潁天子授鉞揖帝整旅隱爾霆發桓桓神誅  
震驚魏方我分矯矯虎視元戎截彼醜旅效此武功武功既彰天  
威薄曜靈武震華暹垂清暴振旅凱入王假有廟假廟伊何本膺  
寵祚土田陪敦四牡載路出餞于郊此惟予頌禮嘉嵩高樂和湛

露改容肅至傾蓋寵步攀帶翩紛珍裘阿那區予惟寧繁遏帝祉  
於穆疇咨敷奏多士將庸元輔相維天子僉曰公侯宜有爰止績  
裳縟藻衰帶重紫遂虛上司命公登宰帝曰丞相朕嘉君德以茲  
軒冕往踐乃職宣爾敷心維黃協極邦國若否四方爾式公拜稽  
首欽翼明聖乃御璣衡仰徽七政祗恪丕顯無易惟命巍巍天  
邑惟清四門公侯作弼煥炳星文重輝熾景協風煙燭百神秩祀  
兆獻思淳克諧房尹遂成帝勳時雍既濟王途克廣儀刑我度軌  
物垂象後遐施歸崇廕惠仰茂德棲音廣問沉響洪範遠迪玄猷  
洞深靈澤崇敷天險重陰翰飛樂嶮淵播泳沉澤豐泉丘潤博雲

林遭世大過彛倫靡肅疊疊公侯思維雅俗發憤戎衣求言禮樂  
被分敦化荷戈思學體仁長物御禮熙國叡鑒擢微玄輝鏡璞戒  
危膏梁叔俊白屋五品時訓民神有鑠我有煥文如曜如辰何以  
崇之匪闡伊人我有烈武如震如霆何以將之保大豐年思弘景  
業熙世登民克壯碩老秉鉞河津祉祚勿引早世幽神仰慕遺  
輝寤辟憂殷嗚呼哀哉永惟我公克明德心紛藹芳和被之惠林  
公侯沒矣孰嗣徽音名存體逝德懋形潛民之秉思好是謳吟嗚  
呼哀哉惟帝念功寵命光大考謚典謨崇榮協泰安宮載考我公  
于邁輔軒啟奎先驅警旆哀風結輿遺思馮益合此休明卽彼重



藹攀慕靡及永戀光愛嗚呼哀哉

陶徵士誄

顏光祿

夫璿玉既美不為池隍之寶桂椒信芳而非園林之實豈其樂深  
而好遠哉蓋云殊性而已故無足至者物之籍也隨踵而立者  
人之薄也若乃業由之抗行夷皓之峻節故已父老光禹錫銖周  
漢而綿世寢遠光靈不屬至使菁華隱沒芳流歇絕不亦惜乎雖  
今之作者人自為量而首路同塵輟塗殊軌者多矣豈所以昭末  
景泛餘波乎有晉徵士尋陽陶淵明南嶽之幽居者也弱不好弄  
長實素心學非稱師文取指達在衆不失其寡處言每見其嘿少  
而貧苦居無僕妾井臼弗任藜藿不給母老子幼就養勤匱遠惟

田生致親之議追悟毛子捧檄之懷初辭州府三命後為彭澤令  
道不偶物棄官從好遂乃解體世紛結志區外定迹溪樓于是乎  
遠灌畦鬻蔬為供魚菽之祭織絢締蕭以充糧粒之費心好異書  
性樂酒德簡棄煩促就成省曠殆所謂國爵屏貴家人忘貧者歟  
有詔徵著作郎稱疾不赴春秋六十有三元嘉四年月日卒於潯  
陽鄉之柴桑里近識悲悼遠士傷情冥默福應嗚呼淑貞夫實以  
誅華名由謚高焉允德義貴賤何莫焉若其寬樂令終之美好廉  
克己之操有合謚典無愆前志故詢諸友好宜謚曰靖節徵士其  
詞曰

物尚孤生人固介立豈伊時邁曷云世及嗟乎若士望古遙集韜  
此洪族蔑彼名級睦親之行至自非敦然諾之信重於布言廉深  
簡潔貞爽粹溫和而能峻博而不繁依世尚同詭時則異有一于  
此而兩默置豈若夫子因心還事畏榮好古薄身厚志世霸虛禮  
州壤推風孝惟義養道必懷邦人之秉彛不隘不恭爵同下士  
祿等上農度量雜鈞進退可限長卿棄官稚賔自免子之寤之何  
悟之辨賦辭歸來高蹈獨善亦既超曠無滯非心汲流奮巖葺宇  
家林晨煙暮靄春煦秋陰陳書綴卷置酒絃琴居備勤儉躬兼貧  
病人否其憂孑然其命隱約就閑還延辭聘非直也明是惟道性

糾纏沉冥漢報施孰云與仁實疑明智謂天高故讐斯義履信曷  
憑思順何寘年在中身疾維疴疾視化如歸臨凶若吉藥劑弗嘗  
禱祀非恤僚幽告終懷如長畢嗚呼哀哉敬述清節式遵遺占存  
不願豐沒無求贍省計却賻輕哀薄歛遭壞以穿旋葬而窆嗚呼  
采哉深心追往遠情逐化自爾介居及我多暇伊好之洽接閭隣  
舍宵盤晝憩非舟非駕念昔宴私舉觴相誨獨正者危至方則礙  
哲人卷舒布在前載取鑑不遠吾覩子佩爾是愀然中言而發遺  
衆速尤迂風先歟身才非實榮毅有歎徽音永矣誰歲余闕嗚呼  
哀哉仁焉而終智焉而斃黔婁既沒展禽亦逝其在先生同塵往

世旌此靖節如彼康惠嗚呼哀哉

陽給事誄

顏光祿

惟永初三年十一月十一日宋故寧遠司馬濮陽太守彭城陽君  
卒嗚呼哀哉瓚少稟志節資性忠果奉上以誠率下有方朝嘉其  
能故授以邊事永初之末佐守滑台值國禍存臻王略中台獲虜  
聞釁廟剝司克幽并騎弩屯逼鞏洛列營綠戍相望屠潰瓚奮其  
猛銳志不遺難立乎將卒之間以緝華裔之衆罷困相保堅守四  
旬上下力屈受陷勅寇士師奔擾棄軍爭免而瓚誓命沈城佻身  
張鏃兵盡器竭斃于旗下非夫貞壯之氣勇烈之志豈能臨敵引

義以死徇節者哉。景平之元，朝廷聞而傷之，有詔曰：「故寧遠司馬濮陽太守陽瓚，滑台之逼，厲誠固守，投命徇節，在危無撓，古之烈士，無以加之，可贈給事中，振恤遺孤，以慰存亡。」追寵既彰，人知慕節，河汴之間，有義風矣。連元嘉廓祚，聖神紀物，光昭茂緒，旌錄舊勳，苟有概于貞孝者，實事感于仁明。末臣蒙固側聞，至訓敢詢諸前典，而為之誄。其辭曰：

貞不常祐，義必有甄。處父勤君，怨在登賢。苦夷致果，題子行間。忠壯之烈，宜自爾先。奮勳雖廢，邑氏遂傳。惟邑及氏，自溫徂陽。孤續既降，普族弗昌。之子之生，立績宋皇。拳猛沈毅，溫敏肅良。如彼竹

柏，負雪懷霜。如彼駢駟，配服駢衡。邊兵喪律，王略未恢。函陝堙阻，湮洛蒿萊。朔馬東騫，胡風南埃。路無歸轄，野有委骸。帝圖斯銀簡，兵授才寔命。陽子佐師，危臺憬彼。危臺在滑之朔，周衛是交。鄭翟是爭，昔惟莘國。今曾邊亭，憑巘結閔。負河紫城，金柝夜擊。和門畫角，料敵厭難。時惟陽生，涼冬氣勁。塞外草哀，渴矣獯虜。乘障犯威，鳴驥橫厲。霜竊高翬，鞅我河縣。俘我洛畿，攢鋒成林。投鞍為圍，翳翳窮壘。嗷嗷羣悲，師老變形。地孤援闕，卒無救馬。實掛秣守，未焚衛攻。已濡褐烈，烈陽子在。困彌達勉，慰痍傷拊。巡饑渴力，雖可窮氣。不可奪義，立邊疆身。終鋒枯鳴，呼哀哉。賁父隕節，魯人是志。汧

督效貞晉策攸託皇上嘉悼思存罷異於以贈之言登給事疏爵  
紀庸恤孤表嗣嗟尔義士沒有餘喜嗚呼哀哉

孝武宣貴妃誄

謝光祿

惟大明六年夏四月壬子宣貴妃薨律谷罷媛龍鄉輟曉照車去  
魏連城辭趙皇帝痛掖殿之既閔悼泉途之已宮巡步檐而臨蕙  
路集重陽而望椒風嗚呼哀哉天罷方隆玉姬下姻肅雍揆景陟  
此爰臻國軫喪淑之傷家疑賈妣之恚敢撰德於旂旒度圖芳于  
鐘萬其辭曰

玄丘煙煜瑤台降芬高唐滌雨巫山鬱雲誕發蘭儀光啟玉度望

月方娥瞻星北婺毓德素里棲景宸軒處麗締裕出懋蘋蘩修詩  
賁道稱圖照言翼訓如幃贊執先門綢繆史館容與經闡陳風緝  
藻臨爰分微游藝禪數撫律窮機躊躇冬愛怡悵秋禪展如之華  
實邦之媛敬勳顯揚肅恭崇憲奉榮維約承慈以邈連下延和臨  
朋違怨祚靈集祉慶藹迎祥皇胤璿式帝女金相聯附齊穎接萼  
均芳以藩以收燭代輝梁眈朔書氛觀台告稷八頌肩和六祈輟  
滲玕瓊滅容暈翟毀衽掩絳瑤光叔華紫禁嗚呼哀哉帷軒夕改  
軒輅晨遷離宮天邃別殿零懸靈不虛襲組帳空煙巾見餘軸匣  
有遺絃嗚呼哀哉移氣朔兮變羅紈白露凝兮歲將闌庭樹驚兮

中帷響金缸暖兮玉座寒純孝粹其俱毀共氣摧其同樂仰昊天  
之莫報怨凱風之徒攀茫昧與善寂寥餘慶喪過于哀棘實滅性  
世喪冲華國虛淵今嗚呼哀哉題湊既肅龜筮既辰階撤兩奠庭  
引雙輪維慕維愛曰子曰身慟皇情于客物崩列辟于上爰崇徽  
章而出寢旬照殊策而去城闔嗚呼哀哉經建春而右轉循閭闔  
而徑渡旌委鬱于飛飛龍委遲于步步鏘楚挽于槐風過邊簫于  
松霧涉姑射而環迴望樂池而頽慕嗚呼哀哉晨輶解鳳曉蓋俄  
金山度寢日隧路抽陰重扃閉兮燈已黯中泉寂兮此夜深銷神  
躬于壤末散靈魂于天尋響乘氣兮蘭馭風德有速兮聲無窮嗚

呼哀哉

濟北相崔君夫人誄

蔡中郎

維延熹四年故濟北相崔夫人卒嗚呼哀哉世喪母儀宗殞憲師  
哀哀孝子靡所瞻依凡百赴弔至止增悲投涕歔歔共叙赫姿  
乃為誄曰

清和有鑠時惟哲母令儀令色爰以資始塞淵其心淑慎其止于  
母斯勤在子斯敏仰覽篇籍俯登繇臬多才多藝于何不有休譽  
邈焉允女之英乃及崔君惟德是行其德伊何冒粹實明虔恭事  
幾契閭中饋敦此婉順疾彼攸遂思齊徽音晨興夜寢穆穆其猷

莫之與二天祚明德底之方穀於赫崔君膺茲祉祿夫人有徹翼  
此清淑仁風溫潤義惠優渥推恩中外施浹族食不兼膳服不  
織穀以儉為榮以奢為辱堂堂其胤惟世之良於其令母受茲義  
方訓以柔和董以嚴剛怒不傷愛喜不亂莊納之執度終然允臧  
是用登階享其寵允雖則崇盛猶匪寧息同其婦子茂師是職服  
貴無荒尊不舍力畧勿不忘惟德之極昔在共姜陪臣之母勞謙  
紡績仲尼是紀矧茲夫人帝室命婦猶日孜孜復禮克己人亦有  
言仁者壽長宜登永年黃耇無疆昊天不弔降此殘殃寢疾彌留  
精爽悴傷慘怛孝子惴惴其惶靡神不舉無藥不將嗚呼哀哉于

是孝子長叫氣絕復蘇號呼告哀不知其辜昊天上帝恣吊遺  
孤尋想遊靈焉識所徂嗚呼哀哉既殯神柩薄言于歸冢宰喪儀  
循禮無遺切切喪主瘠羸哀哀情兮長慕涕兮無晞行旅揮涕千  
里于咨乃謀卜筮言考其良建彼兆域于時翳藏冥冥窅窅無時  
有陽燈燭既滅馬道納光形影不見定省何望嗟其哀矣不可弭  
忘日月代序古有如喪由斯夫人榮烈有章配彼哲彥既隆且昌  
頌景赫奕饋供孔將惟以慰懷庶無永傷嗚呼哀哉

漢交趾都尉胡夫人黃氏神誥

蔡中郎

夫人江陵黃氏之季女字曰列羸其先出自伯翳別封于黃以國

氏焉高祖父汝南太守曾祖父延城大尹祖父番禹令父以主簿  
嘗證太守事奉明君以立臣節漢南之士以為美談初都尉居娶  
于故豫州刺史郎黃君之姊生太傅安樂侯廣及卷令康而卒繼  
室以夫人生童紀未齒而夭夫人懷聖善之姿韶慈母之撫育二  
孤導以義方思齊先姑神罔時恫故能迄用有成誕膺繁祉廣歷  
五鄉七公再封之祿康亦由孝廉宰牧二城九鼎之義夫人是享  
爰暨稚孫更仕三宮或典百里或作虎臣銀艾貂蟬近侍顯尊受  
茲介福于我夫人自都尉仕于京師及廣兄弟式叙漢朝夫人居  
京師六十有餘載其乘輅執贊朝皇后採桑桑于蠶宮手三盆于

繭館者蓋三十年上有帝室寵光之休下有堂宇斤斤之祚心耽  
其榮體安其遠圖長慮迥用遺舊居欲番此焉康寧之時亟以為  
言太夫人年九十一建寧二年薨于太傅府是月辛酉公之季子  
陳番太守碩卒于洛陽左池里舍公術哀悼祇慎其屬遵奉遺意  
不敢失墜乃俾元孫顯咨度羣儒以考其衷僉曰昔帝舜沒于蒼  
梧殞于虞郊二妃薨于江湘不即兆于九疑延陵季子實唯吳人  
長子道終卜葬贏博夫遭時而制不遠遷徙魂氣所之不繫丘壠  
帝舜以之神罔時恫季札以之仲尼嘉焉鑒帝籍之高論綜精靈  
之幽情稽先人之遐迹順母氏之所寧茲事體通而義同允不可



替於是公乃為辭昭告先考然後卜定宅兆龜筮悉從遂營窆  
之事舉封樹之禮十月既望粵翌日己酉葬我夫人黃氏及陳晉  
太守碩于此高原雒陽東界閔亭之阿天子使中常侍謁者李納  
吊且送葬持賻錢二十萬布二百疋再以中牢祠羣后畢會榮哀  
孔備于時濟陽故吏舊民中常侍勾陽于肅等二十三人思應慕  
化推本議銘著斯碑石俾諸昆裔瞻仰以知禮之用是為神誥乃  
申頌曰

於穆夫人家邦之媛昔在嬴氏黃國氏建至于近祖亦降于漢天  
祚明德福祿流衍既作母儀履信思順登壽耄耄用永蕃縵子孫  
以仁追稽先典曆茲洛濱齊跡湘靈配名古人休矣耀光千億斯

年

齊竟陵文宣王行狀

任中丞

公道亞生知照臨幾度孝始人倫忠為令德公實體之非毀譽所  
至天才博瞻學綜該明至若曲臺之禮九師之易樂分龍趙詩析  
齊籍陳農所未究河間所未輯有一于此罔不兼綜者歟昔沛獻  
訪對於雲台東平齊聲於揚史淮南取貴于食時陳思見稱于七  
步方斯茂如也初沈攸之跋扈上流稱亂陝服宋鎮西晉熙王南  
中郎邵陵王並鎮益口世祖毗贊兩藩而任總西伐公時從在軍

鎮西府版寧朔將軍軍主南中郎版補行參軍署法曹于時景燭  
雲火風馳羽檄謀出股肱任切書記遷左軍邵陵王主簿記室參  
軍既允焚林之末實兼儀形之寄力筆不足宣功風體所以弘益  
除邵陵王友又為安南邵陵王長史東夏形勝關河重複選衆而  
舉敦悅斯在除使持節都督會稽南陽臨海永嘉新安五郡諸軍  
事輔國將軍會稽太守太祖受命廣樹藩屏公以高昭武穆惟戚  
惟賢封聞喜縣開國公食邑千戶又以奏課連最進號冠軍將軍  
越人之巫覩正風而化倍篁竹之酋感義讓而失險邪叟志其西  
吳龍丘狹其東臯會武穆皇后崩公星言奔波泣血千里水漿不

入于口者至自禹穴逮衣裳外除心哀內疚禮屈于厭降事迫于  
權奪而茹感肌膚沉痛劇亟故知鐘鼓非樂云之本線麗非降殺  
之要改授征虜將軍丹陽尹良家入徙戚里內屬政非一軌倍備  
五方公內樹寬明外施簡惠神臯載穆較下以清武帝嗣位進封  
竟陵郡王食邑如千戶復授使持節都督南徐兗二州諸軍事鎮  
北將軍南徐州刺史遷使持節侍中都督南兗徐北兗青冀五州  
諸軍事征北將軍南兗州刺史兗徐接壤素漸河潤未及下車仁  
聲先洽玉關靖柝北門寢扃朝旨以董司岳牧敷興邦教方任雖  
重比此為輕徵護軍將軍兼司徒侍中如故又授車騎將軍兼司

徒侍中如故即授司徒侍中又如故上穆三能下敷五典闢玄闈  
以闡化寢鳴鐘以體國翼亮孝治緝熙中教奪金耻訟蹊田自嘿  
不雕其朴用晦其明聲化之有倫繫公是賴庠序肇興儀形國胄  
師氏之選允歸人範以本官領國子祭酒固辭不拜八座初啟以  
公補尚書令式是敷奏百揆時序夫國家之道互為公私居親之  
義逆為隱犯公二極一致愛敬同歸亮誠盡規謀猷弘遠矣  
又授使持節都督揚州諸軍事揚州刺史本官悉如故舊惟淮海  
今則神牧編戶殷阜氓倍滋繁不言之化若門到戶說矣頃之  
解尚書令改授中書監餘悉如故獻納樞機絲綸允緝武皇晏駕寄

深負圖公仰唯國典俛遵遺託俯擗天倫踊絕於地居處之節復  
如居武穆之憂聖主嗣興地居旦奭有詔策授太傅領司徒餘悉  
如故坐而論道動以觀德地尊禮絕親賢莫二又詔加公入朝不  
趨讚拜不明劔履上殿蕭傅之賢曹馬之親兼之者公也復以申  
威重道增崇德統進督南徐州諸軍事餘悉如故並表疏累上  
身沒讓存天不勲遺梁岳頽峻某年某月日歲春秋三十有五詔給  
溫明祕器歛以袞章備九命之禮遣大鴻臚監護喪事朝夕奠祭  
大官共給禮也故以慟極津門感克長樂豈待春人不相傾壘罷  
肆而已哉乃下詔曰褒崇庸德前王之令典追遠尊戚必情之所

隆故使持節都督揚州諸軍事中書監太傅領司徒揚州刺史竟  
陵王新除進督南徐州體睿履正神監淵邈道冠民宗具瞻惟允  
肇自弱齡孝友光備爰及贊契協升景業燮和台曜五教克宣敷  
奏朝端百揆惟穆寄重先領任均負圖諒以齊徽二南同規往哲  
方憑保佑永翼雍熙天不憖遺奄見麗洛哀慕抽割震動于厥心  
今先遠戒期龜謀襲吉茂崇嘉制式弘風猷可追崇假黃鉞侍中  
都督中外諸軍事太宰領大將軍揚州收綠縵綬具九錫服命之  
禮使持節中書監王如故給九旒鑾輅黃屋左纛輜涼車前後部  
羽葆鼓吹挽歌二部虎賁班劍百人葬禮一依晉安平獻王孚故

事公道識虛遠表裏融通淵然萬頃直上千仞僕妾不觀其喜愠  
近侍侍莫見其傾弛他人之善若已有之民之不臧公實貽恥誘  
接恂恂降以顏色方於事上好下規已而廉於殖財施人不倦帝  
子儲季令行禁止國綱天憲寘諸掌握未嘗鞠人于輕刑錮人于  
重議人有不及內恕諸已非意相干每為理屈任天下之重體生  
民之後華衰與縕縉同歸山藻與蓬茨俱逸良田廣宅符仲長之  
言切山洛水協應叟之志丘園東國鎔銖軒冕乃依林構宇傍嶽  
拓架清猿與虛人爭旦緹幙與素纈交輝置之虛室人禁何鞞高  
人何點躡躡于鐘阿徵士劉蚪獻書于衡岳贈以古人之服弘以

度外之禮屈以好士之風申其趨王之意乃知大春屈已于五王  
君大降節于憲后致之有由也其卉木之奇泉石之美公所製山  
居四時序言之已詳文皇帝養德東朝同符作者爰造九言實該  
百行遵衿袂禱于未萌申炯戒於茲日非值旦暮千載故乃萬世  
一時也命工註解衛將軍王儉綴而序之山宇初構超然獨往傾  
而言曰死者可歸誰與入室尚想前良俾若神對乃命畫工圖之  
軒幄既而面屬英賢傷思才淑正婦之操亦有取焉有客游梁朝  
者從容而進曰未見好德愚竊惑焉即命刊削投杖不暇公以為  
出言自口驥驟不追聽受一謬差以千里所造箴銘積成卷軸門

階戶席萬物垂訓先是震于外寢匹者以為不祥將加治葺公曰  
此天譴也無所改修以記吾過且令戒愆不急從諫如順流虛已  
若不足至于言窮藥石若味滋旨信必由中貌無外悅貴而好礼  
怡寄典墳雖牽以物攸孜孜無怠乃撰四部要畧淨律子並勒成  
一家懸諸日月弘洙泗之風闡迦維之化大漸彌留語言盈耳點  
頌之請至誠懇惻豈古人所謂立言于世沒而不朽者歟易名之  
典請遵前烈謹狀

齊司空曲江公行狀

任中丞

公稟靈景宿擅氣中和一匱初登東嶽之功可監埏埴在器瑚璉

之姿先表豈惟荆南有聖童之日襄城著孔甫之稱而已哉故以  
羽儀宗家冠蓋後進路叔之一日千里北海之稱美共治方斯茂  
如也志學之年徧治經紀登隆十載網羅百代藻斷瞻逸蔚為詞  
宗延賈誼而升堂携如而入室加以翰牘精辯發言有章持論  
從容辭無矜尚自河洛丘墟歷載二百俾我逢掖遂淪左社晉宋  
所以遺恨宗祖是用頽懷公自荷方任志在尅復將欲使功遂之  
日身退有所爰乃卜君金陵營帶林壑用辭聊城之賞以為流韓  
之館人謝運往遂輟速圖

齊司空柳世隆行狀

沈隱侯

公稟靈華獄幼挺珪璋清襟素履發乎齷泚及長風贊洞遠儀止  
祥華動合合矩吐言被律時沈攸之狼據陝西氣陵物上而太祖  
登庸作宰天歷在躬攸之播封承之情總全荆之力毗甲十萬鐵  
馬千羣水陸長驚志窺皇邑公抗威川漢勇畧紛紛顯晦有方出  
沒無緒攸之反旆亘圍親受矢石墉櫓乘埤嚴衝駕雉雲翱俯闕  
地穴斜通半藏晚食負戶晨汲公乃綏衆以武應敵以奇靈鋒電  
耀威策雲舉事切三版之危氣損九天之就殘寇外老逆党内摧  
焚舟委甲掬指宵遯公風標秀徹器範洪潤茂乎辭彩雅善鼓琴  
摘舩蔡之高芬纂鐘嵇之妙曲雖嬰拂世務而素業無改臨姑蘓

而想八桂登衡山而望<sup>九</sup>疑七紆邦組三臨蕩甸五職瑞扇一司  
百揆固可以齊衡八凱方駕五臣

建平王太妃周氏行狀

江醴陵

竊聞侯服之譽非黃冠能敷玉食之門寧皂衣所述諒畏褒虛美  
於君后被空名于昂貴然有漢臣誅行晉史書德者亦云實而已  
焉伏見國太妃稟靈惟岳集慶自遠世擅淮汝族冠疇代故以載  
曜聲書式炳騰牒矣太妃誕巽離之正和函雲霧之中氣凝米韶  
歲貴章笄年若迺彤管女圖之學纂組綺縠之工升降處謙之儀  
柔靜居順之節莫不中道若性不嚴而成故譽滿闈閭聲聞軒殿

以元嘉某年歸于故司徒宣簡王既而第高恒倫秩踰外品青軒  
華轂用光國輝素壁丹墀實隆家貴且惟姻娣靡不式瞻而居尊  
以簡訓卑以弘躬謹蘭閨身撫椒第若衛娥之烟行樊羸之英操  
方之茂如也大明二年宣簡王薨太妃藉悲用禮撫孤用慈柔懿  
之德愈彰肅敬之間日被雖文伯之母言不踰閭莒相之主行存  
乎勤無以過也大明某年拜建平王太妃是時今王春秋方富德  
業未隆藉茲金響終能玉播故綺襦出宰弱冠升朝者亦太妃劬  
勞之訓也謂天盖高降年不永以太豫元年二月三日薨于荊州  
之內寢凡厥遠近以哀以歎今祖行有期泉窆無遠素旂望路絲

旌思歸所以垂宣徽容髣髴金石者謹詳牒行狀具以申言

武元楊皇后哀策文

張茂先

天地配序化成兩儀王假有道冀在伉儷姜嫄佐譽二妃興媯仰  
希古昔覲亦同規今胡不然景命夙虧嗚呼哀哉我應圖籙臨統  
方正位於內實在嬪嬙天作之合駿發其祥河嶽降靈啟祚華陽  
奕世豐衍朱紉斯煌續女惟行受命溥將來翼家邦憲度是常緝  
熙陰教德聲顯揚昔我先妣暉曜休光后承前訓奉述遺芳宜嗣  
徽音繼序無荒如何不吊背世隕喪瑤齊無主長去蒸嘗追懷永  
悼率土摧傷嗚呼哀哉陵兆既窆將遷幽都宵陳夙駕元妃其徂  
宮闈遏密階庭空虛設祖布紼告駕啟途服輦綸狄寄象容卓金



輅掩藹裳帳不舒千乘動軫六驥踟蹰銘旌樹表婁邨雲敷初初  
同軌定爰蒸徒孰云不懷哀感萬夫寧神虞卜安體玄廬土房陶  
簠齊制遂初依行祀謚聲被八區雖背明光亦歸皇姑沒而不朽  
世德嗚呼哀哉

宋孝武帝哀策文

謝光祿

應門洞望馳道南除叢塗已撤鬱邑將虛哀子嗣皇帝擗標池稗  
周建旌軫攀七緯之崩淪慟三廬之徂盡百神慕而行雲沉萬  
國哀而素霜賈衣冠緬邈弓斂不追敢緝謳頌髣髴希夷其辭

曰

樞電皇根月瑤國緒胤裔丹陵蟬聯華渚二后在天大行纂武克  
睿克聖重規襲矩昭昭金式明明玉溫望雲其遠就日其尊雨露  
露湛冬暖春暄聲芳納麓道昭賓門上德無稱至功不器昭悵四  
始優遊六位綴響蘭深緝言瓊秘悠哉梁殘眇焉汾肆敬荼開寓  
離經作翰鴻起荆河鸞遊楚漢泗濱霏明江區承魚陝左清郊棠  
陰虛館地維不紐乾綱弛機義庭薄蝕紫路流飛泣血孤負頽瞻  
川沂吞貫樞極義震寰圉誓鉞皇郊詔師收甸七景締華五雲卷  
燭雪怨園邑掃恥瀛縣啟聖宸蓋集寶龍見王室多故國步方蹇  
淮濟裂冠江荆毀冕東楚亂常西華啟募動筭揮圖爰戡爰剪浹

宙斯澄綿區咸鏡修風曉逸德星夕映潯露挺甘舒雲結慶禎彼  
動植信泊荆泳缺禮克宣墜章必構方堂饗極圓汎肆胄南聳郊  
宮北清靈囿瑤軒春藉翠蓋冬狩絰締窮文克定畫武節上呈祥  
介丘載佇在盈念冗成功非處崇鏡中世馬夾前古睿業初遠鴻  
化方亭丹雲承日素景騰星王几去襲綴衣在庭辭重陽之昭昭  
降大夜之冥冥氣質炎涼史詔龜筮文物空嚴鑿和虛衛動屈輅  
之逶迤頽壁羽之容裔出國文而分天地向幽途而異身世龍旌  
鬱而青槐速驚葭亂而白楊翳觀初霜之變條聽秋風之下蕩橋  
山緹雲敷林飭日輦道結寒松庭畫屏芝蓋迎軫上驟春戀萬寓

肅其北較靈阿閱其深隘南維有時傾離光不常鏡騰英聲與茂  
實方流華於舞詠

皇太子妃哀策文

王文憲

肇惟初職芳猷夙就翩翩禮園徘徊樂園視秋齊明方春等茂伊  
宋之李天衢存阻咨我儲貳締緝江許衛女事齊樊姬贊楚美著  
嬪嗣徽音踵武教盈則反否極斯昌肅膺靈命絰締三光往儀衡  
館來式椒堂訓組咸事象服有章八溥仰則六幽望景悠悠草昧  
如何不永方中委曜先秋落穎世有遺塵庭無餘影嗚呼哀哉遵  
三兆之嘉日迨九筮之靈期澄金波而映鑿旆命飛廉而拂瓊輜

揚清笏于漢長動斷挽于雲基

齊明帝哀策文

沈隱侯

龍散既撤備物已陳殯呂無夜夕燎終晨號環輶帷攀探應路容  
衛弗改軒楹如故望東川而不追仰昊天而自訴列聖同軌謚法  
樹聲爰詔掌饋式播遺英其辭曰  
五曜在天遞作民主赫矣帝高蒸哉嗣武多難固業殷憂啟聖時  
惟我皇功符受命爰始濡足坐運機深鵬逝風舉龍動雲陰之郢  
南沂御豫西臨體茲大德懷此小心賓於西門四門穆穆納於百  
揆百揆肅肅德浸堇荼仁被比屋何速何迎無思不服嗣君喪道

不式典謨神器業業事等瞻烏民懷奧主后来其獲皇天眷命授  
以籙圖臨朝凝眸昧旦丕顛斟酌前王擇其令典不言斯應不行  
斯踐路臺靡營離宮弗宴眷言膠鬲啟上庠執儀四代祖述三  
王暉<sup>德</sup>內勳英華外揚禮行罇俎義及幽荒仰庶天德降年永久北  
極齊光南山獻壽滄溟奄竭嵩岱皆朽汾非昊穹惟余之咎攀龍  
詎幾大隧玄玄厭世崇陛卽宮下泉殯階已遽素幕高褰端闈洞  
啟屢緋徐前豸朱闕以南轉乘翠龍而東度絳原野之荒涼屬西  
城之云暮伐金鼓以清道揚悲笳而啟路極厚地而不追終蒼天  
而永慕蒼梧梅遠春薇不泯紀事寂寞龜書可循哲王違世克播

遺塵猗歎萬古，輝光日新。

齊明皇帝謚冊文

謝宣城

維永泰元年九月朔日，哀子嗣皇帝諱仰，惟大行皇帝早棄萬邦，聖烈方遠，式遵帝世，俾也鴻猷，咸以為無名以化，則言繁莫宣其道，有求斯應，則影響度圖，其功所以永言配命，寄心宗極，光昭令德，允樹風聲，伏惟大行皇帝，合信四時，齊明日月，創保大於登庸，通神機於受命，因時以暢，藉九萬而輕舉，天保既定，運四海而高臨，及迺開物成務，重維國綱，風行草化，心往如神，左賢右戚，內榮外禮，輯五材以教民，申三驅而在宥，用能盛德殷存，美善斯集，皇

矣之業既孚，蒸哉之道咸備，景化方率，厭世在天，龜筮告期，遠日無改，仰則前王，俯詢百辟，累德稱睿，允極鴻名，謹命某申奉大牢之奠，謹上尊謚曰明皇帝，廟號高宗，天人允協，神其尚饗，嗚呼哀哉。

昭明太子哀集文

王詹事

屬輅俄軒，龍駟弱步，羽翮前驅，雲旂北御，皇帝哀繼明之寢，耀痛嗣德之殂，芳御帳而悽慟，臨甲觀而增傷，式稽令典，載揚鴻烈，詔撰德於旌旒，永傳徽於舞綴，其辭曰：式載明兩，實惟少陽，既稱上嗣，且曰元良，儀天比峻，儼景騰光。

奉祀延福守器傳芳睿哲膺期旦暮斯在弘莊肅內含和愷識洞  
機深量苞瀛海立德不器至功非宰寬綽居心温恭成性循時孝  
友率由嚴敬咸有種德惠和齊聖三善迺萬國同慶軒締掩精陰  
義弛位纏哀在疚殷夏街恤孺泣無時蔬饘不溢禫導踰月哀號  
未畢實惟監撫亦嗣郊裡問安肅肅視膳恂恂金華玉璫玄駟班  
輪隆家幹國主祭安民光奉成務萬機是理矜慎庶獄勤恤閔市  
誠存隱惻容無愠喜殷勤博施綢繆恩紀爰初敬業離經斷句奠  
爵崇師卑躬待傳寧資導習匪勞審論博約是司時敏斯務辨究  
空微思探幾蹟馳神圖緯研精文畫沈吟典禮優遊方冊屢飲膏

腴含咀肴核括囊流略包舉藝文遍該緇素殫極丘墳勝帙充積  
儒墨區分瞻河闡訓望魯揚芬吟詠性靈豈惟薄伎屬辭婉約緣  
情綺靡字無點竄筆不停紙壯思泉流清障雲委總覽時才網羅  
英茂學窮優洽辭歸繁富或擅談叢或稱文圃四友推德七子慙  
秀望苑招賢華池愛客託乘同舟連輿接席搗文揆藻飛觴汎醪  
思隆置醴賞逾賜璧徽風遐被盛業日新仁器非重德輔易導澤  
沉兆庶福降百神四方慕義天下歸仁雲物告徵禘汾褰象星羅  
恒耀山頽朽壤靈儀上賓德音長往具僚無蔭諮承安仰嗚呼哀  
哉皇情卓愍切心纏痛胤嗣長號跼萼增慟慕結親遊悲動氓衆

憂若殄邦懼同折棟嗚呼哀哉首夏司開麥秋紀節容衛徒警菁  
華委絕書幌空張談筵罷設虛饋朦朧孤燈翳翳嗚呼哀哉簡辰  
請日筮合皂貞幽址夙啟玄宮獻成武校齊列文物增明昔遊漳  
逢賓從無聲今歸郊郭徒御相驚嗚呼哀哉背絳闕以遠徂輔青  
門而徐轉指馳道而拒前望國都而不踐陵修阪之威夷遡平原  
之悠緬驥蹠足以酸嘶挽悽鏘而流泣嗚呼哀哉混哀音於簫籥  
變愁容于天日雖夏木之森陰返寒林之蕭瑟既將反而復疑如  
有求而遂失謂天地其無心遽永潛于容質嗚呼哀哉即玄宮之  
冥漠安神寢之清闕傳聲華于懋典觀德崇于微謚懋忠貞于日

月播鴻名于天地惟小臣之紀言實含毫而無媿嗚呼哀哉

宋文帝元后哀策

顏光祿

惟元嘉十七年七月二十六日大行皇后崩於顯陽殿粵九月二  
十七日將遷瘞於長寧陵禮也龍輅纒綽容翟結駟皇塗昭列神  
路幽巖皇帝親臨祖饋躬瞻宵載飾遺儀於組旒淪徂音乎玳珮  
悲黼造之移御痛暈禴之重晦降輿客位撤奠殯階乃命史臣累  
德述懷其辭曰  
倫昭儼昇有物有憑圓精初爍方祗始凝昭哉世族祥發慶膺祕  
儀景冒圖光玉繩昌暉在陰柔明在進率禮蹈和稱詩納順爰

自待年金聲夙振亦既有行素章增絢象服是加言觀維則俾我  
皇風始基嬪德惠門川流芳猷淵塞方江泳漢載謠南國伊昔不  
造鴻化中微用集寶命仰陟天機釋位公宮登曜紫闈欽若皇姑  
允迪前徽孝達寧親敬行宗祀進思才淑傍綜圖史發音在詠勳  
容成紀靈政穆宣房樂韶禮坤則順成星軒潤飾德之所屆惟深  
必測下節震騰上清眎側有來斯雍無思不極謂道輔仁司化莫  
晰象物方臻眡履告泠太和既融收華委世蘭殿長陰椒塗弛衛  
嗚呼哀哉戒涼在律杪秋即窅霜夜沉唱曉月升魄入神警引五  
輅迹噉噉儲嗣哀哀列辟灑零玉墀雨泗丹掖撫存悼亡感今

懷昔嗚呼哀哉南背國門北首山園僕人按馬頰轅遙酸紫  
蓋眇泣素軒滅絳清都夷體壽原邑野淪瀉戎夏悲誰來芳可述  
往駕弗援嗚呼哀哉

烏梁元帝祭王僧辯母貞敬太夫人文

王司空

維爾世基武子族懋陽元金相比映玉德齊溫既稱女則兼循婦  
言書圖鏡覽辭章討論教貽俎豆訓及平原楚伐將兵孟軻成德  
盡忠資敬自家刑國顯允其儀惟民之則反命師旅既修戎補  
茲衮職卷有龜蒙母由子貴亶爾斯崇嘉命永集麗章既降居  
高能降處貴思冲慶資善始榮兼合終崦嵫既夕蒹葭蚤秋奔駟

難返衝濤詎留背龍門而西顧過夏首而東浮越三宮之遐嶽經  
三江之汎汎鬱鬱增嶺浮雲蔽虧滔滔江漢逝者如斯銘旌故旄  
字毀遺碑即虛舟而談真想徂魂之有知嗚呼哀哉

為湘州祭屈原文

顏光祿

維有宋五年月日湘州刺史吳郡張邵恭承帝命建旗舊楚訪懷  
沙之淵得捐珮之浦弭節羅潭艤舟汨渚乃遣戶曹掾某敬祭故  
楚三閭大夫屈君之靈蘭薰而摧玉纈則折物忌堅方人諱明潔  
曰若先生逢辰之缺温風迨時飛霜急節羸辛邁紛昭懷不端謀  
折儀尚貞茂椒蘭身絕郢闕迹徧湘干此物荃蕪連類龍鸞聲

溢金石志華日月如彼樹芳實穎實發望汨心歛瞻羅思越藉用  
可塵昭忠難闕

祭從弟敬遠文

陶彭澤

歲在辛亥月惟仲秋旬有九日從弟敬遠卜辰云定永寧后土感  
平生之遊處悲一往之不返情惻惻以摧心淚愍愍而盈眼乃以  
園果時醪祖其將行嗚呼哀哉於鑠吾弟有操有概孝發幼齡友  
自天愛少思寡欲靡執靡介後已先人臨財思惠心遺得失情不  
依世其色能温其言則厲樂聖朋高好是文藝遙遙帝鄉爰感竒  
心絕粒委務考槃山陰淙淙懸留暖授荒林晨採上藥夕閑素琴



曰仁者壽竊獨信之如何斯言徒能見欺年甫過立奄與世辭長  
歸蒿里邈無還期惟我與爾匪但親友父則同生母則從母相及  
齟齬並滙偏咎斯情實深斯愛實厚念疇昔日同房之歡冬無緼  
褐夏渴孰輦相將以道相聞以顏豈不多乏勿忘飢寒余嘗學仕  
纏綿人事汎浪無成懼負素志歛策歸來爾知我意嘗願携手冥  
彼衆議每憶有秋我將其刈與汝偕行舫舟同濟三宿水濱樂飲  
川界靜月澄高温風始逝撫杯而言物久人脆奈何吾弟先我離  
世事不可尋思亦何極日徂月流寒暑代息死生異方存止有域  
侯晨永歸指塗載陟呱呱遺稚未能正言哀哀發人禮儀孔閑庭

樹如故齋宇廓然孰云故遠何時復還余惟人斯味茲近情蒼龜  
有吉制我祖行望旒翩翩執筆涕盈神其有知昭余中誠嗚呼  
哀哉

自祭文

歲唯丁卯律中無射天寒夜長風氣蕭索鴻鴈于征草木黃落陶  
子將辭逆旅之館衣歸於本宅故人悽其相悲同祖行於今夕羞  
以嘉蔬荐以清酌候顏已冥聆音愈漠嗚呼哀哉茫茫大塊悠悠  
高曼是生萬物余得為人自余為人逢運之貧輦孰屢空締綌冬  
陳含歡谷汲行歌負薪翳翳柴門事我宵晨春秋代謝有務中

園載耘載籽。迺有迺繁。欣以素牘。和以七絃。冬曝其日。夏濯其泉。  
勤靡餘勞。心有常閒。樂天委分。以至百年。惟此百年。夫人愛之。懼  
彼無成。愒日惜時。存為世珍。沒亦見思。嗟我獨邁。曾是其異。茲寵非  
已。榮涅豈吾。緇粹兀窮。虛酣飲賦。詩識運知。命疇能固。眷余今斯  
化。可以無恨。壽涉百齡。身慕肥遁。從老得終。奚所復戀。寒暑逾邁。  
亡既異存。外姻晨來。良友宵奔。葬之中野。以安其魂。宵宵我行。蕭  
蕭墓門。咎耻宋臣。儉笑王孫。廊分已滅。慨焉已遐。不封不樹。日月  
遂過。匪貴前譽。孰重後歆。人生賈難。死如之何。嗚呼哀哉。

